

Regional News Unit AIR Aizawl
Thursday, March 13, 2025
Time - 7:30 -7:40Hrs

REGIONAL NEWS BULLETIN

HEADLINES (MORNING)

- Home Minister hlui Pu Lalchamlisan, Aizawl khawpui atanga Assam Rifles sawnchhuah chungchanga MNF agreement pawm tlaka ngailo ZPM chuan a aia chhe mah agreement an ziahpui a ti.
- Agriculture Minister Pu PC Vanlalruata'n sawhthing lei tawhna man pek kim a la ni loh thu House a hrilh.
- Prime Minister Narendra Modia chuan nimin khan Mauritius National Day lawmnaah khuallian niin a hmanpui
- Ramchhunga bawnghnute tharchhuah chu kum 10 chhungin zaa 63.5 in a pung.

<><><>

LALCHAMLIANA

MNF National Core Committee member Pu Lalchamlisan, Home Minister hlui chuan, Aizawl khawpui atanga Assam Rifles sawnchhuah chungchanga MNF agreement pawm tlaka ngailo ZPM chuan a aia chhe mah agreement an ziahpui a ti.

Nimin khan Aizawl Press Club ah chanchinbu mite kawmin Pu Lalchamlisan chuan Chief Minister sawi dana, Delhi ah kalin Assam Rifles hotute chu chaw kilpuiin inremna draft siam sa lovin an ziah chawp a, an sign pui ta mai tih chu mipangngai tan mak tih loh rual a ni lo a ti a, hei mai bakah hian MNF final agreement inthlan avanga an bawhzui tak loh ami chu lachhuakin a aia thalo mah an siam a ni a ti.

MNF agreement aia a that lohna chu Assam Rifles Range area leh DIG residence Raj Bhawan chhak ami chu luah zui zel se, amaherawhchu chhiah erawh pe ve thin tawh rawh se, tih chu ZPM chuan an relh lova, Assam Rifles thilphut- Zokhawsanga ram luah kum 99 atana land lease sorkarin a pek chu automatic in renew ni rawh se tih chu MNF in a remti lo a, danah a awm lo, lease period a tawp dawna a thara dil leh mai ni se an ti a ni.

Assam Rifle ten Aizawlkhawpui chhunga an ram luahte leh building man te chhut chhuakin Mizoram sorkarin a pe ang ti a ZPM in an inrempui phe chu a zahthlak hle a ni a ti a, Mizoram sorkarin Zokhawsanga Assam Rifles chu nitin tui ltr nuai 4 leh sing 5 a pe ang tiin a insawi ba bawk a ni a ti.

Pu Lalchamlisan chuan, ZPM inremna siamah hian Kum 2024 Oct ni 23 MOA an sign ah chuan Chite lui area, Church area leh Babutlang te thla thum chhungin an chhuahsan tur a ni an ti a, a dangte chu academic session zawh hun April 2025 ral hmaa chhuahsan tur a ni a, chungte chu lammual, hospital area, main barrack, land & bulding, quarter hills complex leh building, school area, war memorial leh Mandir te a ni, a ti.

Pu Lalchamlisan chuan Assembly Budget Session neih mekah ni 10 khan Chief Minister Pu Lalduhoma chuan Assam Rifles te Aizawl khawpui laili atanga sawn chhuak tura sorkar hmasa hunlaia hmalakna kallaiah 'Home Dept nena Memorandum of Agreement an lo siam chu pawm tlakah an ngai lo a, a tharin an siam' tih a sawi chu thudik tawklo a ni a ti a.

Ngaihtuahna fim tak nena rim taka MoA lo buaipuitu Home Dept. official te thlenga tih mualpho tumna tha lo tak a ni bawk a. Thu dik famkim lo Chief Minister in a sawi leh mai thin hi a vanduaithlak hle a ni a ti.

Pu Lalchamliana chuan MOA hmasa kha fimkhur leh uluk takin, sorkar dan engkim zawm chungin duan a ni, a ti a. Assam Rifles lamin ram luah zui beisei an neihte pawh Mizoram sorkarin a remtih loh dan leh AR ten an chhuahsan ngei a tul chhante pawh sorkar dan ang thlapin, felfai taka chhanlet nghal vek a ni , a ti a. Hetiang hi thil awmdan anih laiin Sorkar hmasain MOU a lo duanah Quarter Guard leh a chhak lam tlangte pawh AR te luah chhun zawmtir zel tura lo remti fel vek ang maia Chief Minister in Assembly House meuha a sawi chhuak duh chu a vanduaithlak hle a ni a ti bawk.

<><><>

POWER MINISTER

Power & Electricity Minister Pu F. Rodinglana'n tun dinhmunah sorkarin eng chhit man bill ba a nei lova, sorkar hmasa ba zawng zawng pawh an pe tla vek tawh tih a sawi.

He thu hi nimina Assembly rorel inkhawmah sawiin, Minister chuan eng chhit man bill vbch 200 dawn ba chu an rul vek tawh a ti a, tun dinhmunah leiba an rulh that avanga pawisa hmuh let vbch 2 leh nuai 6 dawn an nei tawh tih House a hrilh a ni. Minister chuan Tuirini Hydel project pawmpuina an hmu tawh tih sawiin an khuap thei a nih chuan Megawatt 24 a nih dawn thu leh cheng vbc 676.79 a ni dawn a ti a, sum chungchangah pawh New Development Bank te nen New Delhi-ah an inhmukhawm tawh tih sawiin sawrkar laipui lam pawhin an phur pui hle a ti a, reiloteah a chhanna phuisui zawk an dawn thuai a beisei a ni a ti bawk.

Minister chuan Serlui B thuam tha turin study team ten thawm that a ngaih dan an zirchiang tawh a ti a, siamthat ngai lian zual siamtha turin hun leh tha bakah cheng vbc tam tak a ngai dawn tih sawiin sorkar sum dinhmunin a zir loh avangin a theih angin hma an la mek a ti a, megawatt tam vak lo in an kalpui mek tih sawiin nikum 2024 March thla thleng khan Lawngtlai district-ah kawlphehtha luh lohna, khua 48 awmin hma an la mek tih a sawi bawk.

Minister chuan tun dinhmuna Mizoramin kawlphehtha a intodelh theihna tura sorkar-in tuikhuah (Hydel Project) pathum a kalpui mek te thlen chin chu House a hrilh a, kumina zawh hman beisei a ni tih a sawi bawk a ni.

<><><>

AGRI MINISTER

Agriculture Minister Pu PC Vanlalruata'n sawhthing lei tawhna man pek kim a la ni loh thu House a hrilh.

He thu hi nimina Assembly rorel inkhawma zawhna leh chhanna hunah sawiin, sawhthing an buk tawh engemawzat man chu ni 7 chhungin pek nghal a ni a ti a, hetihrial hian sawhthing collection centre-ah sawhthing buk tawh si, a man la tihfel loh a la awm tih sawiin nakin zelah sorkar a inrawlh loh hunah loneitute hnenah thlai hralhna man a luh nghal theihna turin an inzirtir chho mek a ti a, loneitu bank account la nei remchang lote chu an sawhthing hralhna man society account-ah a lut tih a sawi bawk.

Agriculture Minister chuan Financial Year 2023-2024 kumtawp dawna cheng vbc 110 dah chu hman zawh a la nih loh avangin kumin Financial Year 2024-2025 chhungin thlai thar leina tur pawisa ruahmanna hran siam a ni lo a ti a, sorkar chuan cheng vbc 110 atangin thlai thar lei nan cheng vbc 28 an hmang tawh tih sawiin sorkar chuan aieng tharchhuaktuten a sawngbawltute hnena an hralh theih hun atan kumin January thla atanga May thla inkar a ruahman sak a ti a, aieng hring chu a sawngbawltu hnenah kg khatah cheng 20 a an hralh theihna turin an ruahman tih a sawi bawk.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni. Vawiin chawhnu dar 2 leh a chanve-ah Chanchinthar puan leh a ni ang.

<><><>

PM

Prime Minister Narendra Modia chuan nimin khan Mauritius National Day lawmnaah khuallian niin a hmanpui. He hunah hian Mauritius President Dharambeer Gokhool chuan Mauritius chawimawina sang Grand Commander of the Order of the Star and Key of the Indian Ocean a hlan a. India leh Mauritius inkara thawhdunnaah a thawh that avangin PM Modia hi he chawimawina hi hlan a ni a. India mi zingah he chawimawina dawng hmasa ber a ni. Nimin khan PM Modia leh Mauritius PM Ramgoolam te chuan Atal Bihari Vajpayee Institute of Public Service and Innovation an hawng bawk a ni. Nimin vek khan Prime Minister Narendra Modia leh Mauritius PM Navin Chandra Ramgoolam te an inkawm a. India leh Mauritius ten inremna tur thuthlung pariat an zia. Thuchhuah intawm an siamah PM Modia chuan Mauritius chu India tana thawhpui pawimawh tak anih thu sawiin khawvel chhim lamahte, Indian Ocean chhehvel leh Africa khawmualpui lama hmalaknaah an pawimawh hle tih a sawi a. Indian Ocean kaltlanga inzawm mai nilovin hnam ziarang leh nunphungah pawh an inzawmna a thuk hle tih a sawi a ni.

<><><>

MILK

Ramchhunga bawnghnute tharchhuah chu kum 10 chhungin zaa 63.5 in a pung. Union Fisheries,Animal Husbandry and Dairying Minister Rajeev Ranjan Singh chuan Rajya Sabha-a zawhna chhangin kum 10 chhugna bawnghnute tharchhuah hi avaiin tonne maktaduai 239 a tling tawh tih a sawi a. Khavelah India chu bawnghnute tharchhuak hnem ber a nih thu a sawi bawk a ni..

<><><>

RANKING

Ramchhunga University leh Institution pakua chu subject thliar hranga khawvela zirna in tha 50 thlanchhuah zingah an tel. QS World University Rankings 15-na chu nimin khan puan a ni a. Indian School of Mines (ISM) Dhanbad chu Engineering-Mineral and Mining ah khawvel pumah 20 na a ni a. Subject thlan bikah ramchhunga zirna in zinga thleng sang ber a ni a.

Indian Institute of Technology (IIT) Bombay chu 28-na niin IIT Kharagpur chu 45 na ani a. Heng bakah IIT Madras (Petroleum Engineering) leh Jawaharlal Nehru University (JNU) te chu a sang 50 zingah an lang bawk a ni.

<><><>